



De meëling

Opins woarze doa, de meëling
Ze zoog neet gezonk oet
Heur broen vereg et sjoemelig
Och woar ze get mager um de sjnoet

Mieng vrouw goof heur get broeëd
Ze noom dat oet heur hank
Alsof ze zich al joare houwe gekank
En jieëker daag woar ze doa

Noa een tiedje houw os vuëgelke
Ee buuksjke wie ee kuëgelke
Heur veerkes pasde werum
Um 't lief, ze keek och wer monter

Went vier get later woare
Zoot ze op de vinsterbank te granke
Of ze zage wool, woa blief gier?
Es ze 't op houw, vergoot ze os noeëts te bedanke

Ze pitjsde mit ee oog noa mich
Of oos vuëgelke wool zage
Went 't sjtrak wermer weëd, da
Fleut ich ee sjoëen leedje vuur dich

Jan Halmans

Vriehed

riehed is 'n kostbaar bezit,
Es gier de litste tied good hubt opgelit!
Op het hoeëge platform dat v'r de welt hubbe geneumd,
Wurd doa van nog ummer op hieël veuël plaatsje gedreumd!
Geweun leëve en ooch angere leëve loate,
Want angesj mits-te mit twieë moate!
Dat is 'n gedachte die vingt toch gene verkieërd,
Want angesj hubbe v'r al die joare toch verriks wieëinig bie gelieërd!
Went v'r ophuëre mit dat poeëte gezeëg,
Hubbe v'r ooch samen toekomstige weëg!

Ron Logister

Limmerick

Inne man oet Bavel
Hou doer dat gesjavel
Gee vel mier oppe navel

Jan van Haaf

Twieë vusje

Twieë vusje zitte in inne kómp
en zjwumme rónk en rónk.
Ich kiek d'r noa en vroag mich aaf,
weer van die twieë zou,
't menke zien en weer de vrouw?

Dat kin ich neet zeen zag geer mesjien,
weer is noe d'r Sjeng en weer 't Katrien?
Num de proof ins óp de sóm,
en werp get voor ins in d'r kómp,
hapt d'r Sjeng dan mótt dat 't menke zien
hapt 't vruike , dan is dat 't Katrien

ich hoap dat 't heimit dudelig is,
d'r aad en sekse van d'r vusj.

Thei Janssen †

Wat ene miensj kind

Ich hub waal 'ns zon moment
Dat ich der van bewos bin
Wat ene einfache miensj
Nog ummer neet begriepe kin
Mer hoe deëzelfde miensj
Oneindig dankbaar vuur mot zin

Dat me mit die kiekers
Zoeëmer alles kint zieën om zich heer
De kluëre van de blome en vuëgel
De wolke, de zon, de moan, 'n sjteer
Buusje, beënje, velder en wei
Kluëre van de bloesem en van de herfstbleer

Dat me mit die gekke lappe
Aan diene kop aan jieëder zie
Kint loestere, kint huëre

De toeëne van 'n sjoeën melodie
De violiste van 'n groeët orkes
Of de vuëgel die fleute 'n lentesymfonie

Dat me mit die sjtekke onge gen vot
Kint lope, kint renne, kint sjpringe
Dat me mit de sjtum
Kint sjpreëke en leedjes kint zinge
Dat 't hart neet alleen kint kloppe
Mer dat me der ooch leefde mit kint vinge

Wiel Roeselers

In 't vueërijoar

Dan komme de sjwarbele weer trök,
en hōbbe dan hiejl get kilomiejters aafgelach,
't is de vroag of ze dat allemoal lökt,
want de al get ouwer sjwarbele hōbbe neet miej diej krach,
om zoeëwiejt te vleège en bliejve achter,
Alleen de sjterke vleège van Afrika tot hiej,
En lègge de eijkes weer op 't zelfde plekske in oeës sjuuër,
Went ze weer biejos trök komme zint ver bliej,
Soms helpe viejr ze bie 't boeëwe dat is ègelök teage de natueër.
De sjwarbele vleege meestal ueëver water van beake en viejvers,
en vange doa mūgge hiejl sjnel,
't zint echte drijvers,
en vleege noeëts alleen mer same mit èè gans sjtel,
De mūgge kriejge geen ènkele kans,
en hōbbe pech,
Gene ontspringt de dans,
zoeë vange ze d'r hiejl get weg,
Dat is natueërlèk natueër.

Jan Theunissen

Doer de velder

Ich loop 't paad aaf, 't karresjpoar doer
Ongerweëg zigk ich daag teëge inne boer
Zoeë kom ich langs 'n veldj mit kroet
Hie woare de molle aan 't sjtoeëte
(die trampelere zunt de boel aan 't versjangelere)
Dan goan ich richting viever
Hie kom ich neet wiejer
De broame en nieëtele sjlete mich in
Doe hou 't vuur mich gene zin
Ich drieë mich om en goan truuk
En zeuk inne oetweëg langs de sjtruuk

Jan van Haaf

Vuurjoar

't is vuurjoar va 2009
En vier zitte boete op de bank
En dont de oge touw
Vier loestere noa de vuëgel gezank
Dat is 't leëve
En mit ee teske kaffe va de vrouw
Es vier 't mage beleëve
Da kunt d'r zoeëmer gauw
Noe sjtont vier op en gunt noa binne
Want der kruupt ee wölksjke vuur de zon

Jan Halmans

Vuurjoarstied

Eindelijk is 't weer zoeë wiet,
't is weer vuurjoars tied.
't Sönneke sjient weer doeër de beum,
't graas wurd weer langzaam greun.
De blome beginne weer te gruije,
Sommige beginne zelfs te bluije.
De vuëgel vleege weer tsjilpend rondj,
Wat zunt die natuurlijke dinger toch gezondj.
't Is gewuën 'n lus vuur 't oog jieëder daag,
Gelukkig dat dat noch ummer maag.
Preuf 't vuurjoar zoeë lang wieë 't geet,
Doe zals zieën wie good dich dat deet.
Zoeë lang vier doa van noch kinne geneete,
Hove vier os zelf neet op te sjleete!
Dink dan ooch ins wat hubbe vier 't toch good,
En es 't nuëdig is put dan oeët dat vuurjoar hiël veuël nuje mood!

Ron Logister.

Vreugjoar sjnoeve

Vuurzichtig, mer hoarsjerp
Wurpt de zon heur sjtroale
De zon mit heure gouwe lach
Kumt mich noa boete hoale
Ze drapeert heur gouwe dikke
Uëver blujende narcissessjtroeve
Dan ruuks ze de hyacinte
Doe kins 't vreugjoar sjnoeve
Kieks verrukt noa de magnolia
En 'n vuëgelke in de Sering

Flut ziene ege aria
Al vruijt zich is blie
Mit dat nuje leëve
Dinkt gier ooch waal íns dra
Weë os dat heët gegeëve?

Wiel Roeselers